



ՄԱՅՐ ԱԹՈՌԻ ՄԻԱԲԱՆ, ԾՐՋԱՆԱՎԱՐՏ՝ ԱԹԵՆՔԻ ՀԱՄԱԼՍԱՐԱՆԻՑ

«Էջմիածին» ամսագրի խմբագրությունը ուրախությամբ ողջունում է Մայր Աթոռի միաբան արժանապատիվ Տեր Եզնիկ քահանա Պետրոսյանին, որ մա 1980—1981 ուսումնական տարում փայլուն հաջողությամբ ավարտել է Աթենքի ազգային և Կաթողիկոսությանի անվան համալսարանի աստվածաբանական ֆակուլտետը «շատ լավ» գնահատականով և ստացել համապատասխան դիպլոմ:

«Էջմիածին» ամսագրի խմբագրությունը այս փայլուն հաջողության առիթով ջերմորեն և սիրով ողջունում է Տ. Եզնիկ քահանա Պետրոսյանին ու նրան բարեմաղթում նորանոր հաջողություններ՝ իր ապագա եկեղեցական, կրթական-հաստիարակչական և գրական-բանասիրական գործունեության մեջ:

Տ. Եզնիկ քահանա Պետրոսյանը, ավագանի անունով՝ Սամվել, ծնվել է 1955 թվականի հունվարի 19-ին Թբիլիսիում: 1958 թվականին ընտանիքով փոխադրվել է Երևան և 1961—1967 թվականներին սովորել համար 82 միջնակարգ դպրոցում:

1967 թվականին մա ընդունվել է հոգևոր ճեմարան: 1972 թվականի դեկտեմբերի 25-ին ձեռնադրվել է սարկավագ՝ ձեռամբ Մայր տաճարի լուսարարապետ Տ. Հուսիկ եպս. Սանթրուրյանի:

1973 թվականին ավարտել է ճեմարանը բացառիկ հաջողությամբ: Ավարտաճառի նյութն է եղել՝ «Մովսես վրդ. Երզնկացու «Հաւաքումն համառօտ մեկնութեան սրբոյ

պատարագին, զոր յառաջագոյն արարեալ է սրբոց լուսաւոր հարցն» աշխատությունը (ուսումնասիրություն, բնագիր, հավելված): Սույն ավարտաճառի «ուսումնասիրություն» բաժինը հրատարակվել է «Էջմիածին» ամսագրի 1973 թվականի Թ և ԺԱ համարներում:

1973 թվականի հուլիսի 22-ին Սամվել սարկավագը Ս. Էջմիածնի Մայր տաճարում ձեռնադրվել է քահանա՝ ձեռամբ ԱՄՆ-ից ուխտավորաբար Մայր Աթոռ ժամանած և այժմ Գերագույն Հոգևոր Խորհրդի ատենապետ Տ. Սիոն արքեպ. Մանուկյանի, և անվանվել Տ. Եզնիկ քահանա:

1975 թվականի աշնանը մա «գերազանց» գնահատականով պաշտպանել է վարդապետական ավարտաճառը որի թեման է եղել՝ «Մովսես վրդ. Երզնկացու դավանաբանական գործերը» (ուսումնասիրություն և բնագրեր): Սույն աշխատությունը մույնպես տպագրվել է «Էջմիածին» ամսագրում, 1974 թվականի Թ, Ժ, ԺԲ, 1975 թվականի Ա և Գ համարներում:

1976 թվականի հունվարի 19-ին, Վեհափառ Հայրապետի բարեհաճ կարգադրությամբ, մեկնել է Աթենք՝ իր աստվածաբանական ուսումը շրունակելու տեղի համալսարանում:

1980 թվականի աշնանը Վեհափառ Հայրապետի կարգադրությամբ Տ. Եզնիկ քահանա նշանակվել է Ս. Էջմիածնի հոգևոր ճեմարանի տեսուչ:

